

南
唐
書
注

南
華
經
卷
之
一

南唐書序

天祿改元余待罪中執法監察御史王主敬謂余曰公
向在南臺蓋嘗命郡士戚光纂輯金陵志始訪得南唐
書其於文獻遺闕大有所攷證裨助良多且爲之音釋
焉因屬博士程熟等就加校訂鋟板與諸史並行之越
明年余得告還金陵書適就光來請序按南唐本紀烈
祖系出憲宗四世閒關困阨纔有江淮之地僅餘三十
年卒不復振而宋滅之雖爲國褊小觀其文物當時諸
國莫與之並其賢才碩輔固不逮蜀漢武侯而張延翰
劉仁瞻潘佑韓熙載孫忌徐鍇之徒文武才業忠節聲
華炳耀一時有不可揜矧其閒政化得失興衰治亂之

跡有可爲世鑒戒者尤不可泯也竊謂唐末契丹雄盛
虎視中原晉漢之君臣事惟謹顧獨拳拳於江淮小國
聘使不絕嘗獻橐駝并羊馬千計高麗亦歲貢方物意
者久服唐恩信尊唐餘風以唐爲猶未亡也宋承五季
周統目爲僭僞故其國亡而史錄散佚不彰馬元康胡
恢等迭有所述今復罕見至山陰陸游著成此書最號
有法傳者亦寡後世有能秉春秋直筆究明綱目統緒
之旨者或有所攷而辨之姑識其端以俟君子余前忝
史館朝廷嘗議修宋遼金三史而未暇他日太史氏復
申前議必將有取於是書焉集賢大學士奎章閣大學
士光祿大夫知經筵事趙世延序

南唐書題辭

按陸游新修南唐書止十五卷今合三紀得十八卷又
戚光音釋一卷而光注謂游亦不著名以他書考而知
之不知劉仁瞻傳論甚明更無疑者何必他書然以陸
視馬令書雖少十餘卷而芟薙稗穢折衷諸家殊得史
氏家法如三主直稱曰紀不必如馬以書字寓貶其列
傳若宋太后不許臨朝聽政亦一賢后故以奔通道流
一事潛置耿先生傳宋齊丘老而無子馬謂其有窺竊
之計因斷其訾之太過周后誅詞馬書全載從善傳馬
不錄登高文陸則翦誅附文蓋重友于戒佚思也孫忌
死於使周馬有肉臺盤事李元清不二心之臣馬有科

斂事陸皆棄而不載蓋重其節略其微也至若馬之所
有如柴克宏有陳杲仁助陣潘佑是顏延之後身盧絳
夢耿玉真後與同刑伍喬窗中人掌孫忌謁淮南王廟
事俱以怪誕蠲斥而馬之所無如劉仁瞻無夫人五日
不食死江文蔚不載奏疏景遂無弘翼行鳩刁彥能無
子衍孫約徐鍇傳寥寥數語陸皆考補無遺其他若申
屠令堅之誓死報國廖居素之立死井中李鄒延之不
草降書見殺段處常之面誚契丹死虜中趙仁澤之不
拜吳越王張雄之滿門死難喬匡舜之極諫親征張義
方之力振紀綱歐陽廣之疏劾邊鎬高遠之料楚難守
陳褒之十世同居此皆馬書所無賴務觀以顯則馬之

疏陋可見而陸之史筆足貴矣沈士龍題

余始得馬令南唐書以爲政可作酒後談資耳及得陸
游新修南唐書讀之乃知正史稗官迥自懸別未可以
僞史忽之因以二書相較則馬視陸書凡益徐溫徐知
訓知詢知誨知諫徐主李章韋建孫魴康仁傑周彬夏
寶松許賢顏詡鄭元素姚景魯崇範馬文義許規張宣
李德柔褚仁規李德明李徵古邵拙舒雅劉茂忠孟賓
于潘賁羅穎正旭黃載湯悅張洎徐鉉木平和尙李家
明楊名高王感化彭利用應之小長老北僧張遇賢諸
祐劉澄劉從効閩王氏楚馬氏建國譜世系譜等共四
十九篇陸視馬書則益周鄴陳曙徐遊朱匡業申屠令

堅喬匡舜高遠廖居素張義方歐陽廣廖偃彭師曷張
易龔慎儀郭廷謂陳起周惟簡鄭彥華仲寓御廚史守
冲段處常趙仁澤張雄陳褒浮圖契丹高麗等共二十
八篇陸又併徐主于李建勳傳李德明于鍾謨傳夏竇
松於劉洞傳李徽古於陳覺傳劉茂忠於申屠令堅傳
李家明於申漸高傳小長老北僧於浮圖傳張遇賢於
邊鎬傳凡合併九篇其若王會卽馬書王安因名犯南
漢祖諱改賜名會查文徽傳有李弘義卽馬書李仁達
五代史十國世家云元宗更其名曰弘義而孫忌張彥
卿李貽業卽馬書孫晟張彥能李夷業但譌一字耳大
都馬之所餘皆在可略陸之所增皆不可無者卽如馬

分義養義死等傳如徐溫一傳最爲可笑夫烈祖旣嘗父事之矣置之列傳可乎使冠之首則徐李異姓千古史冊無此義例劉彥貞壽州潰敗遂失江北之地朱令贇以軍貲數十萬一鼓盡之江上而唐社旋屋二人雖脫身猶當顯誅以謝誤國之罪何得以辱義死至於潘佑李元清之忠槩入誅死歸明與鍾謨劉承勳輩同列豈不冤哉馬又謂後主詠兄弟四人三百口不堪閒坐細思量四人是指出元宗景遂景達景遼尤爲乖謬四人蓋謂從鎰從謙從度從信耳世寧有稱父及諸父爲兄弟之理乎宜務觀痛爲刪翦足稱此書一大快也胡震亨題

南唐書箋注凡例

共十五條

一南唐書舊有胡恢陸游馬令三書恢書不傳惟陸馬二書傳於世陸書發凡起例簡略詳略可觀足繼遷固三主名紀儼然以正統歸之其識見較馬令超遠可與歐陽公五代史相匹非諸僞史可比也

一元人趙世延嘗命戚光纂金陵志始得陸書爲之音釋刊行予因輯纂金陵廣志亦取陸書而注之皆以其有關於金陵也

一興化李映碧先生曾注南唐書其本子不依陸書自爲更定實大同小異耳陸書以宋爲主李則欲

以南唐繼後唐不用宋朔予所注倣裴松之注三國意但依其本文不敢妄自紛更

一映碧先生注此書所見正史之外不多故所注寥寥予家舊有徐騎省集江南別錄南唐近事江南野史江南錄十國紀年九國志五代春秋等書皆李先生所未見者又冊府元龜玉海等書亦李先生未采者予皆彙注之又閱宋人說部書不下二百種有關於南唐者亦悉錄之較李先生所注爲麤備

一裴松之注三國酈道玄注水經有例存焉不宜廣收雜引予之注南唐也聊備見聞不敢妄遺古人

一字至筆削之權請俟之大手筆非予所敢僭也
一馬書胡震亨以爲正可作酒後談資耳以予觀之
令非史才所紀多稗官之類當與江南錄江南野
史諸書並行非放翁比也然瑣事多可考訂故以
爲注

一諸人陸書無傳見於他書者以其行事相類附注
於後

一冊府元龜所引五代史多僻居正本注中參用之
一異代人物如人習見習聞者可以不注如以爲淺
學寡識之人何以知之予應之曰淺學寡識之人
自不讀此故不爲此多費紙墨如千家詩注也

再注傳
一陳霆唐餘紀傳及近人吳山賓李映碧王鍾仁輩
俱以南唐爲正統謂宋宜直接南唐其說蓋本於
元人楊維禎吳山賓作三唐編年譜錄於後

一嘉禾朱太史彝尊嘗欲注五代史予亦有志焉搜
覓藏書有關五代者得百十種家難之後化爲雲
煙此志未逮惟應屬之太史耳

一予注始於庚申成於乙亥前後十六年記初注時
黃徵君俞邵見之以爲必傳今書成黃子已赴玉
樓矣把卷爲之慨然

一列傳中西平王周本及其子建康子弘祚實予家
三世三世祖也予家建康肇於此家譜與列傳同

予之注南唐書亦以存吾之所自出也

一郡縣山水地名倣三國裴注例不盡注

一武林吳任臣太史有十國春秋考究精詳箋注亦多備予注多引用焉

康熙三十四年孟冬祥符周在浚耐龕識

南唐書注目錄

卷一

烈祖本紀

卷二

元宗本紀

卷三

後主本紀

卷四

宋齊王列傳

卷五

周徐查邊列傳

卷六

周柴何王張馬游刁列傳

卷七

徐高鍾常史沈三陳江毛列傳

卷八

三徐三王二朱胡申屠喬睦列傳

卷九

劉高盧陳李廖列傳

卷十

張李皇甫江歐列傳

卷十一

馬孫廖彭列傳

卷十二

孟陳韓朱列傳

卷十三

劉潘李嚴張龔列傳

卷十四

郭張林盧蒯二陳列傳

卷十五

周鄭李三劉江汪郭伍蕭李盧朱王魏列傳

卷十六

后妃諸王列傳